

V
LYCIENSIS

Lyciensis dioecesis e Provincia ecclesiastica Hydruntina seiungitur et Apostolicae Sedi immediate subicitur.

IOANNES EPISCOPUS
SERVUS SERVORUM DEI
AD PERPETUAM REI MEMORIAM

Cum a nobis expostulatum sit ut dioecesis Lyciensis, adhuc Hydruntinae metropolitanae Ecclesiae suffraganea, directo Apostolicae Sedi subiceretur, adhibitas preces admittendas esse censuimus, illud persuasum habentes hoc in Lyciensis pro tempore Antistitis decorem esse cesurum. Haec enim Ecclesia, antiquitate venerabilis, monumentis illustris, magna nostris temporibus cepit incrementa civilisque Provinciae caput fuit declarata, illudque mirabile fuit quod una cum civili progressu christianae Mei flammam summopere aluit christianaeque vitae optima dedit documenta. In quibus Eucharisticus Conventus profecto annumeranda est, paucis abhinc annis habitus, ad quem plurimi ex universis Italiae regionibus convenerunt, Christi supernum regnum et gratiam celebraturi. Quae cum ita sint, novae rerum conditioni aptius providere cupientes, Nostramque simul benevolentiam erga Lyciensem populum exprimere volentes, consilio audito venerabilis Fratris Nostri S. R. E. Cardinalis Sacrae Congregationis Consistorialis a Secretis, atque eorum consensu suppleto qui hac super re aliquid iuris habeant vel se putent habere, summa Nostra potestate Lyciensem Sedem a Provincia ecclesiastica Hydruntina, in Apulia exstante, *separamus eamque Nobis et Apostolicae Sedi directo obnoxiam facimus, contrariis minime obstantibus.* Haec Nostrae voluntatis decreta exsequenda curabit venerabilis Frater Carolus Grano, Archiepiscopus titulo Thessalonicensis atque Apostolicus in Italia Nuntius, factis ad id necessariis facultatibus, cum potestate alium etiam delegandi, dummodo virum ecclesiastica dignitate ornatum. Re vero acta, idem documenta exarari faciet eaque sinceris exemplis ad Sacram Congregationem Consistorialem quam primum mittet.

Has vero Litteras nunc et in posterum efficaces esse et fore volumus ; ita quidem ut quae per eas decreta sunt ab iis quorum res est religiose serventur, atque igitur vim suam obtineant. Quarum Litterarum effi-

cacitati nulla, cuiusvis generis, contraria praescripta officere poterunt, cum per has Litteras iisdem derogemus omnibus. Quapropter si quis, quavis praeditus auctoritate, sive sciens sive insciens contra egerit ac Nos ediximus, id prorsus irritum atque inane haberi iubemus. Nemini praeterea haec voluntatis Nostrae documenta vel scindere vel corrumpere liceat; quin immo harum Litterarum exemplis et locis, sive typis impressis sive manu exaratis, quae sigillum viri praeferant in ecclesiastica dignitate constituti simulque ab aliquo publico tabellione sint subscripta, eadem omnino habenda erit fides, quae hisce haberetur, si ostenderentur. Quae Nostra decreta in universum si quis vel spreverit vel quoquo modo detrectaverit, sciat se poenas esse subiturum iis iure statutas, qui Summorum Pontificum iussa non fecerint.

Datum Roma, apud S. Petrum, die duodevicesimo mensis Septembris, anno Domini millesimo nongentesimo sexagesimo, Pontificatus Nostri secundo.

IACOBUS A. Card. COPELLO
S. R. E. Cancellarius

MARCELLUS Card. MIMMI
S. Congr. Consistorialis a Secretis

Franciscus Tinello

Apostolicam Cancellariam Regens

Franciscus H. Ferretti, Proton. Apost.
Caesar Federici, Proton. Apost.

Loco £8 Plumbi

In Ap. Can. tab., vol. CIV, n. 89.

VI

VIETNAMENSIS

In Vietnamensi regione Hierarchia Episcopalis constituitur

IOANNES EPISCOPUS

SERVUS SERVORUM DEI

AD PERPETUAM REI MEMORIAM

Venerabilium Nostrorum S. R. E. Fratrum Cardinalium Sacro Fidei Propagandae Consilio praepositorum sententiam probantes, qui, post auditum dilectum Filium Marium Brini, Apostolicum in Indosina Delegatum, opportunum esse peraptumque rei christianae aestimaverunt in Vietnamensi regione Hierarchiam Episcopalem constituere, re Nos